

Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiuppara:

Inuussutissarsiuutiginaq aalisarsinnaaneq piniarsinnaanerlu aatsaat ukiut pingasut Kalaallit Nunaanni najugaqareersimagaanni pisinnaatitaaffinngornissaa siunertaralugu Naalackersuisut UKA14-mut Aalisarnej pillugu inatsisartut inatsisaat nr. 18, 31. oktober 1996-imeersup kiisalu Piniarneq aallaaniarnerlu pillugit Inatsisartut inatsisaat nr. 12, 29. oktober 1999-imeersup allannngortinnissaannut siunnersuusioqqullugit peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasorta q Lars Mathæussen, Siumut)

Tunngavilersuut:

Inuit nunani allamiut Kalaallit Nunaannut suliaartortut nunatsinniileraangamik tupinnangitsumik ilaasa sunngiffimmini aalisarnej piniarnerlu aallutilertarpaat, namminersorlutik ilinniartinneqarlutilluunniit, taamaalillutillu imminnut aamma nerisassatigut pilersorsinnaalertarlutik pinngortitarsuup alianaatsorsuup tunniussaani. Tamanna periarfissaq nunaqavissuungitsunit qujarunneqartarsimassaqaq.

Tamanna periarfissaq killilersorneqartariaqalerpoq, tassami taamannak suliaartortunut piumasaaqqaarani periarfissiineq akisussaassuseqannginneruvoq, aamma piujuartitsinissaq sillimaniarnerlu eqqarsaatigalugit. Nunatsinnummi suliaartortut tikinnerminniit ukiut pingasut qaangiukkaangata aatsaat sunngiffimmini aalisarsinnaallutillu piniarsinnaatitaalertariaqarput.

Suliaartortut tikinnerminniit ukiut pingasut qaangiunnissaata tungaanut nunatsinni aalisarnej, piniarneq, imaani timaanilu angalasinnaaneq sillimaniarnerlu pillugit ilisimasaat qaffassarneqqaartariaqarput. Aalisartut piniartullu tamatumani ilinniartitsisussatut piukkunnaatilerujussuupput.

Aalisakkat qanoq tisanissai, tuttu qanoq aattorneqarnissai anorersuartussaattilluguluunniit toqqup qanoq napparneqarnissaa pingaarutilerujussuupput ilinniutigissallugit, sillimaniarneq aamma eqqarsaatigalugu. Nunatta imarsua peqqarniissinnaasoq, sikusartumilu sikup ulorianaatigisinnaasai aamma pingaaruteqarpoq ilisimasaqarfiginissai.

Ilisimaneqarpoq nunani allani arlalinni avataaniit suliaartortut imaaliallaannaq nuna tikitartik aalisarfigisinnaanagulu pinialuffigisinnaaneq ajoraat, tamaani piumasaaqatit sakkortoorujussuusarmata aamma piujuartitsinissaq sillimaniarnerlu eqqarsaatigalugit.

Siunnersuutip aningaasatigut allaffissornikkullu pisortanut kinguneqaatissai

Siunnersuusiorneq Namminersorlutik Oqartussanut allaffissornikkut aningaasartuutaassaaq, AC-tut atorfillip ukiup affaa avillugu sulineranik 125.000 kr.-nik naleqartumik.

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Aalisarnermik piniarnermillu inuussutissarsiuteqartut aningaasanik amerlanersusunik kaaviaartitsilersinnaanerak naatsorsuutigineqarsinnaavoq, tassami inuit nunatsinnut suliaartortut ukiut pingasut siulliit aalisakkanik neqinillu nunatsinneersunik aalisartuniit piniartuniillu annertunerusumik pisisarnissaat ilimagineqarmat.

Siunnersuutip innuttaasunut allaffissornikkut aningaasatigullu kinguneqaatissai

Soqanngilaq.